

SAMOA

Faatulagaina o Aiaiga

- | | |
|--------------------------------------|--|
| 1. Igoa puupuu ma le amataga. | 5. Tulaga e iloagofie ai tagata palota ma tagata palota taitoatasi |
| 2. Faamatalaina o uiga o upu | 6. Uiga agavaa o tagata palota |
| 3. Tofi o le Komesina o Faiga Palota | 7. Faatinoga o "O'o" ma "Momoli" |
| 4. Vaega Faaupufai | |

2005, Nu. 3

O SE TULAFONO e teuteu ai le Tulafono o Faiga Palota 1963.

[31 Ianuari 2005]

UA FAIA e le Fono Aoao Faitulafono o Samoa i totonu o le Palemene ua potopoto e faapea:-

1. Igoa puupuu ma le amataga-(1) E mafai ona taua lenei Tulafono o le Tulafono o Teuteuga o le Tulafono o Faiga Palota 2005 ma e tatau ona faitauina faatasi ma avea o se vaega o le Tulafono o Faiga Palota 1963 (o le Tulafono Autu).

(2) O lenei Tulafono e tatau ona amata faamamaluina i se aso ua filifilia e le Palemia.

(3) O le faasilasilaga o le amata faamamaluina e tatau ona lomía faasalalau i le gagana Samoa ma le gagana Peretania i totonu o le Savali ma se isi nusipepa o lo o faasalalauina i totonu o Samoa.

2. Faamatalaina o uiga o upu-(1) Ua teuteuina le fuaiupu 2 o le Tulafono Autu i le aveesea o faamatalaga o le “Ofisa Sili o Faiga Palota” ma le “Resitara” ma faaofi i ai faamatalaga ua taua mulimuli ane i le faasologa sao o mataitusi o le pi faitau faaperetania:

“Komesina o Faiga Palota” ma le “Komesina” o lona uiga o le Komesina o Faiga Palota ua tofia i lalo o le fuaiupu 3, ma e aofia ai so o se tagata ua tofia e avea ma Sui Komesina o Faiga Palota i lalo o le fuaiupu 3 ma so o se tagata ua faatagaina e le Komesina o Faiga Palota po o le Sui Komesina o Faiga Palota ina ia faatino matafaioi, galuega tauave, tiute tauave ma malosiaga o le Komesina o Faiga Palota po o le Sui Komesina o Faiga Palota, i le a lava le tulaga e manaomia ai;

“tulafono o galuega a le Malo” o lona uiga so o se tulafono o lo o faamalosiá e faasino i le vaega o le Malo ma e aofia ai –

(a) Le Tulafono o Galuega a le Malo 2004; ma

(b) Le Tulafono o le Pulega o Tupe a le Malo 2001;

“Tulafono Tumau” o lona uiga o Tulafono Tumau a le Palemene o Samoa.

(2) Ua teuteuina le Tulafono Autu i le aveesea o upu “Ofisa Sili o Faiga Palota”, “Resitara o Tagata Palota ma Tagata Palota Taitoatasi”, “Resitara”, “Ofisa Sili o Faiga Palota ma le Resitara”, “Ofisa Sili o Faiga Palota po o le Resitara” i so o se mea e aliali mai ai ia upu, e aofia ai ma pepa faatumu o lo o i totonu o le Faamatalaga Muamua ma faaulutala uma, ma suia i le upu “Komesina”, ae vagana ai mo pepa faatumu i totonu o le Faamatalaga Muamua lea e tatau ona suia i ai upu “Komesina o Faiga Palota”.

3. Tofi o le Komesina o Faiga Palota – Ua teuteuina le Tulafono Autu i le aveesea o le faaulutala “Tagata Ofisa” (pe a tuanai le fuaiupu 2) ma le fuaiupu 3 ma le 4 ma suia e faapea:

“Tofi o le Komesina o Faiga Palota

3. Komesina o Faiga Palota-(1) I le noatia ma le fai fuafua i lenei fuaiupu, o le a tatau ona tofia e Le Ao o le Malo, i le faia i luga o le fautuaga a le Kapeneta, se Komesina o Faiga Palota o ia lea o le a tatau ona ia te ia ma ona faatinoina matafaioi, galuega tauave, tiute tauave ma malosiaga ua faaee atu i lenei Tulafono ma so o se tulafono e faasino i ai.

(2) E tatau i le Komesina ona:

- (a) umia le tofi mo se vaitaimi e tolu tausaga i luga o tuutuuga ma aiaiga ua faamaonia e le Kapeneta;
- (b) totogi atu ia te ia totogi, alauni ma isi faamanuiaga e pei ona faatonuina e le Kapeneta, ina ua uma ona tauaao e le Kapeneta se lipoti mai le Komiti Faufautua mo Totogi ina ia tusa ai ma aiaiga o le Tulafono o le Komiti Faufautua mo Totogi 2003;
- (c) ia lē umia so o se isi tofi o le Malo po o e auai i so o se pisinisi po o isi galuega e aunoa ma le faamaonia muamua e le Kapeneta i se tusitusiga;
- (d) i le taimi ua tofia ai ma a o umia le tulaga o le Komesina, e lē:
 - (i) avea o se sui o so o se vaega faaupufai; po o
 - (ii) fesoasoani, lagolago pe faamaonia so o se Sui Usufono, so o se Sui Faatu ma so o se tagata o ia lea ua tautinoina se faamoemoe ina ia avea o se Sui Faatu, e ese mai ai i le faatinoina o matafaioi, galuega tauave, tiute tauave ma malosiaga o le Komesina i lalo o lenei Tulafono;

- (e) noatia i tulafono o galuega a le Malo; ma
- (f) agavaa mo le toe tofia, i le noatia ma le fai fuafua i le taussia o lenei Tulafono ma faatinoga talafeagai lelei.

(3) E tatau i le Komesina ona ia tuua le tofi o le Komesina i se taimi vave pe afai ua ia:

- (a) solia le faafuaiupu (2)(c) po o le (2)(d) po o le (4); po o
- (b) tautino lona gaumativa i totonu o Samoa po o se isi nofoaga; po o
- (c) i le taimi o le tofiga ma a o umia le tulaga o le Komesina, e i ai sona moliaga ua faamaonia faaletulafono po o ua faamaonia se solitulafono mo so o se solitulafono i totonu o Samoa po o se isi nofoaga:
 - (i) i lalo o lenei Tulafono; po o
 - (ii) e aofia ai le lē faamaoni po o aga tauvalea; po o
 - (iii) pe afai o le faasalaga mo sea solitulafono e aofia ai le nofosala i le falepuipui mo se tausaga e 1 pe sili atu (e tusa lava po o ua uma ona faaee po o ua faaee atu ia faasalaga e faatatau i ia moliaga ua faamaonia faaletulafono); po o
- (d) ua faamaonia e se fomai e faapea e le gafatia le faatinoga o matafaioi, galuega tauave, tiute tauave ma malosiaga o le Komesina e mafua mai ona ua le atoatoa le malosi o le tino po o le mafaufau; po o
- (e) ua toesea mai le galuega po o Samoa mo se vai taimi e 5 aso sosoo e aunoa ma se maliega tusitusia a le Minisita po o se isi faanoi faaletulafono; po o
- (f) ina ua maea suesuega talafeagai ua faaalua manino e le Faamasino Sili o le Faamasinoga Sili, e faapea sa auai i so o se faatinoga tau tagata lava ia po o i se tulaga aloaia po o isi amioga i totonu o Samoa po o isi nofoaga lea

ua fuafuaina e le Faamasino Sili, i le faia i lana pule faitalia maumaututu, e faapea sa mafai ona po o ua tauleagaina ai po o sa mafai ona po o ua masalomia ai le tulaga faatuatuaina po o le faamaoni po o le tulaga lē faaituau o:

(i) le tofi o le Komesina; po o

(ii) le taualumaga o faiga palota a Samoa; po o

(iii) le faafoeina lelei o lenei Tulafono.

(4) E tatau i le Komesina i le taimi o lona tofiga ma i tausaga taitasi mulimuli ane i le aso 30 o Iuni, ona tuuina atu i Le Ao o le Malo, le Fofoga Fetalai, le Minisita ma le Failautusi o le Fono Aoaofaitulafono se Tautinoga o Aia Tau Tupe ma Moliaga ua faamaonia faaletulafono i se faiga ua faamaonia e le Loia Sili.

(5) E tatau ona avanoa Tautinoga ua faia i lalo o le faafuaiupu (4) i le Ofisa o le Failautusi o le Fono Aoaofaitulafono i itula masani faigaluega mo le asiasia e tagata lautele e aunoa ma se tau.

(6) Pe afai:

(a) ua avanoa le Tofi o le Komesina; po o

(b) o lo o ave aso malolo o le Komesina po o o lo o toesea mai le galuega; po o

(c) mo so o se isi mafuaaga ua lē mafai po o ua lē naunau ai le Komesina e faatino ana matafaioi, galuega tauave, tiute tauave ma malosiaiga o le Komesina,

e mafai e Le Ao o le Malo, i le faia i luga o le fautuaga a le Kapeneta, ona tofia se tagata ua agavaa e avea ma Komesina i lalo o lenei fuaiupu e avea ma Sui Komesina o Faiga Palota mo se vaitaimi e le silia le 3 masina.

(7) E tatau i se Sui Komesina o Faiga Palota ua tofia i lalo o le faafuaiupu (6) ona:

(a) noatia i aiaiga o lenei Tulafono, e aofia ai lenei fuaiupu, i le tulaga o lo o ogatasi ai ia aiaiga ma le faafuaiupu (6);

- (b) faatino matafaioi, galuega tauave, tiute tauave ma malosiaga o le Komesina; ma
- (c) faapea ua avea ma Komesina mo faamoemoega uma a o ia umia pea lea tofiga.

3A. Matafaioi, galuega tauave, tiute tauave ma malosiaga a le Komesina-(1) E tatau ona i ai i le Komesina matafaioi, galuega tauave ma tiute tauave ua taua i lalo:

- (a) Le faatinoga o matafaioi, galuega tauave, tiute tauave ma malosiaga ua tuuina atu i le Komesina i lalo o lenei Tulafono ma so o se tulafono talafeagai;
- (b) Le fautuaina o Le Ao o le Malo, le Fono Aoaofaitulafono ma so o se Komiti o le Fono Aoaofaitulafono (e ala atu i le Fofoga Fetalai), le Malo ma le Minisita e faatatau i le faiga palota a Samoa, faiga faavae ma tulafono;
- (c) Le tuuina atu o fesoasoani ma fautuaga talafeagai i le Fofoga Fetalai, Sui Usufono, le Failautusi o le Fono Aoaofaitulafono, Sui Faatutu ma tagata ua tautino se faamoemoe e avea o se Sui Faatu e faasino i lo latou taasisia o aiaiga o lenei Tulafono ma so o se tulafono talafeagai;
- (d) I luga o se faatonuga tusitusia mai le Fono Aoaofaitulafono (e ala atu i le Fofoga Fetalai) po o le Kapeneta (e ala atu i le Minisita) po o le Minisita po o e ala i se fuafuaga a le Komesina lava ia, le amatalia, lagolago, tauaveina ma lomia faasalalau ni sailiiliga faapea ni suesuega e uiga i faiga palota a Samoa ma tulafono;
- (e) Le faataunuuina o ni polokalame faalauiloa ma polokalame faaaoaoga mo tagata lautele e faatatau i faiga palota a Samoa ma tulafono;

- (f) Le saunia ma tuuina atu i le Minisita o se lipoti faaletausaga i totonu o le 6 masina o le faaiuga o tausaga faaletupe taitasi e faasino i galuega a le ofisa o le Komesina, o sea lipoti ia aofia ai faamatalaga o tupe ma faamaumauga o faamatalaga o tupe ma lipoti a suetusi e uiga i ia faamatalaga ma faamaumauga o tupe i se faiga ua faamaonia ma sueina faasuetusi e le Pule ma Suetusi Sili;
 - (g) Le saunia ma tuuina atu i le Fofoga Fetalai se lipoti e faasino i le faatinoga ma faaiuga o Faiga Palota Aoao taitasi ma faiga palota laiti taitasi i totonu o le 6 masina mai le aso o ia faiga palota;
 - (h) Le tuuina atu, i mataupu ua faamaonia e le Kapeneta, o fesoasoani i mataupu e faasino i faiga palota ma palota lautele (e aofia ai le faafaigaluegaina le tumau o tagata faigaluega ma le faaooina atu po o le nonoina atu o mea e fai ai galuega i pulega a atunuu mai fafo ma faalapopotoga faava o malo ma faaitulagi; ma
 - (i) Le faatinoina o isi lava matafaioi, galuega tauave, tiute tauave ma malosiaga ua faaeeina atu i le Komesina i lalo o so o se isi tulafono.
- (2) I le taliaina o se lipoti i lalo o le:
- (a) faafuaiupu (1)(f), e tatau i le Minisita ona faataatia le lipoti i luma o le Fono Aoao Faitulafono i le taimi lava lea;
 - (b) faafuaiupu (1)(g), e tatau i le Fofoga Fetalai ona faataatia le lipoti i luma o le Fono Aoao Faitulafono i le taimi lava lea.
- (3) E tatau ona i ai i le Komesina le malosiaga e faataunuu ai matafaioi uma, galuega tauave ma tiute tauave ua faaeeina atu i lenei Tulafono ma so o se tulafono talafeagai.

3B. Tagata ofisa a le Komesina-(1) I le noatia ma le fai fuafua i le faafuaiupu (5), e mafai e le Komisi o Galuega a le Malo ona tofia i luga o le fautuaga a le Komesina:

- (a) Se Komesina Lagolago o Faiga Palota ma isi Tagata Ofisa ma Ofisa Lagolago e pei ona manaomia;
- (b) Ofisa Fai Palota, Sui Ofisa Fai Palota, Tagata Ofisa o Faiga Palota, Sui Resitara ma isi lava tagata ofisa ma failautusi e pei ona manaomia ina ia faataunuu aiaiga o lenei Tulafono; ma
- (c) Tagata suitulaga mo so o se tagata ua tofia i lalo o le parakalafa (a) ina ia galulue pe afai ua gasegase, toesea, maliu pe aveesea i latou ia.

(2) E tatau ona i ai i tagata suitulaga ua tofia i lalo o le faafuaiupu (1)(b) matafaioi, galuega tauave, tiute tauave ma malosiaga uma o tagata o lo o latou suitulaga ai.

(3) Mo faamoemoega uma, e tatau ona avea le faia faapea e se tagata suitulaga o galuega ma molimau ua lava e faapea ai ua faatagaina le tagata suitulaga e faapea ona faia.

(4) E tatau ona noatia ma fai fuafua tagata uma ua tofia i lalo o lenei fuaiupu i pule ma faatonuga a le Komesina.

(5) I le noatia ma le fai fuafua i le faafuaiupu (4):

- (a) E tatau ona i ai i Sui Ofisa Faipalota taitoatasi uma ma mafai ona latou faatinoina matafaioi, galuega tauave, tiute tauave ma malosiaga uma o se Ofisa Fai Palota i totonu ma autafa o le fale palota ua tofia ai; ma
- (b) E tatau ona i ai i Sui Resitara taitoatasi uma ma mafai ona latou faatinoina matafaioi, galuega tauave, tiute tauave ma malosiaga uma o le Komesina.

4. Tiute tauave e lipotia ai faiga masalomia o le solia o tulafono-(1) E tatau i tagata uma ua faafaigaluegaina i totonu o le Ofisa o le Komesina po o i lalo o le pule po o le faatonuga a le Komesina ona lipotia i se taimi vave i le Komesina so o se solitulafono po o se solitulafono masalomia o so o se aiaiga o lenei Tulafono po o so o se isi

tulafono talafeagai.

(2) Afai:

(a) ua maua e le Komesina se lipoti i lalo o lenei faafuaiupu (1); po o

(b) ua silafia e le Komesina so o se faiga po o se faiga masalomia o le solia o aiaiga o lenei Tulafono po o so o se tulafono talafeagai,

e tatau i le Komesina ona faamautu e faapea o sea faiga po o se faiga masalomia o le solia o le Tulafono ua lipotia i le pulega talafeagai mo suesuega, moliaga faaetulafono po o isi gaoioiga, e pei ona manaomia ai i lea tulaga.”

4. Vaega faaupufai-(1) Ua teuteuina le Vaega IIA o le Tulafono Autu e ala i le faaofiina i ai o le vaega ua taua mulimuli mai pe a tuana'i le fuaiupu 15E:

“15F. Filifilia o Sui Faatutu - E ese ai i so o se isi tulafono, e aofia ai ae le faatapulaaina i Tulafono Tumau:

(1) I le noatia ma le fai fuafua i faafuaiupu (3), e tatau i se Sui Faatu ua filifilia e avea o se Sui Usufono, pe afai o lo o faaalua i le pepa palota mo lea faiga palota le auai o le Sui Faatu i se vaega faaupufai, ona nofo i totonu o le Fono Aoao Faitulafono e avea ai o se Sui Usufono o lea vaega faaupufai a o faagasolo le paeaiga lea sa filifilia ai lea Sui Faatu.

(2) I le noatia ma le fai fuafua i le faafuaiupu (4), e mafai e se Sui Faatu ua filifilia e avea o se Sui Usufono, pe afai o lo o faaalua i le pepa palota mo lea faiga palota o lea Sui Faatu e tutoatasi (o lona uiga o le Sui Faatu e le o se sui o se vaega faaupufai i le taimi o le faiga palota), a o lumanai ai lona faia o le tautoga o le loto faamaoni, ona auai i se vaega faaupufai i se faiga ua aiaia i Tulafono Tumau, ma mulimuli ane e tatau i sea Sui Faatu filifilia ona nofo i totonu o le Fono Aoao Faitulafono e avea o se sui o lea vaega faaupufai a o faagasolo le paeaiga lea sa filifilia ai lea Sui Faatu.

(3) I le noatia ma le fai fuafua i le faafuaiupu (4), o se Sui Faatu ua filifilia e avea o se Sui Usufono, pe afai o lo o faaalua i le pepa palota mo lea faiga palota le auai o le Sui Faatu i se vaega faaupufai ma ina ua filifilia, a o lumanai ai le faia o le tautoga o le loto faamaoni, e foliga mai e faapea e le o atoa sui auai o sea vaega faaupufai ina ia mafai ai ona aloaia o se vaega faaupufai i totonu o le Fono Aoaofaitulafono i lalo o Tulafono Tumau, e mafai, a o lumanai ai le faia o le tautoga o le loto faamaoni, ona auai atu i se isi vaega faaupufai, pe avea o se sui usufono tutoatasi i le faiga ua aiaia i Tulafono Tumau ma mulimuli ane e tatau i le Sui Faatu filifilia ona nofo i totonu o le Fono Aoaofaitulafono e avea o se sui usufono o lea vaega faaupufai, i le po o le a lava le tulaga e mafai ai, a o faagasolo le paeaiga lea sa filifilia ai lea Sui Faatu.

(4) Afai:

(a) O se Sui Faatu filifilia e avea o se sui usufono ua po o ua avea, i le po o le a lava le tulaga e mafai ai, o se sui usufono o se vaega faaupufai e tusa ai ma le faafuaiupu (1), po o le (2) po o le (3); ma

(b) Ua faamavae mulimuli ane le Sui Faatu mai sea vaega faaupufai ma ua avea o se sui auai o se isi vaega faaupufai a o faagasolo le paeaiga lea sa filifilia ai lea Sui Faatu,

ua tatau ona avanoa le nofoa o sea Sui Faatu e avea ai o se Sui Usufono o le Palemene ma e tatau ona tauleagavaaina mai lona umia o sea nofoa.”

(2) Ua teuteuina le fuaiupu 10 o le Tulafono Autu e ala i le faaofiina o le vaega ua taua mulimuli mai i se faatulagaga sao o le faasologa o mataitusi o le pi faitau faaperetania:

“(j) Afai o le Sui Usufono ua faia se gaoioiga ina ia tusa ai ma aiaiga o le fuaiupu 15F(4)(a) ma le (b); po o.”

5. Tulaga e iloagofie ai tagata palota ma tagata palota

taitoatasi-(1) Ua teuteuina le Tulafono Autu i le faaofiina i ai o vaega ua taua mulimuli mai ina ua tuanai le fuaiupu 25B(1):

“(1A) O faafuaiupu (1A) i le (1K) e aofia uma ai e tatau ona faaaogaina i Vaega III, IV ma le V o lenei Tulafono.

(1B) E ui i isi aiaiga o lenei Tulafono, pe afai o lo o i ai ni eseesea i le va o lenei fuaiupu ma aiaiga i totonu o Vaega III, IV, ma le V, e tatau ona faaaogaina lenei fuaiupu i le tulaga e oo i ai sea eseesea.

(1C) I le taimi e mauaina ai se tusi talosaga mo le faamauina po o le toe faamauina po o le liliuina ese atu o le faamauina e avea o se tagata palota po o se tagata palota taitoatasi, e tatau i le Komesina ona pueina se ata pe faia ina ia pueina se ata o le tagata o lo o sailia sea faamauina po o le toe faamauina po o le faaliliu ese atu o le faamauina, po o le a lava le tulaga e manaomia ai.

(1D) I le noatia ma le fai fuafua i le faafuaiupu (1J), pe afai o se tagata ua taua i totonu o le faafuaiupu (1C) ua faamauina pe ua toe faamauina e avea o se tagata palota po o se tagata palota taitoatasi po o lona faamauina e avea o se tagata palota po o se tagata palota taitoatasi ua faaliliu ese atu e tusa o lenei Tulafono, e tatau i le Komesina ona tusia pe lomina le ata o lea tagata i le lisi o igoa talafeagai ia feagai tonu ma le igoa o lea tagata.

(1E) Afai ua faaaogaina se lisi o faasologa o igoa i se Faiga Palota Aoao po o se Faiga Palota Laititi, e tatau i le Komesina ma tagata ofisa fai palota uma ona faaaogaina lisi o faasologa o igoa o le aupalota ua saunia e tusa ai ma le faafuaiupu (1D).

(1F) Afai e manaomia i lenei Tulafono po o se isi tulafono se lisi o le faagasologa o igoa o le aupalota ina ia avanoa mo asiasiga a tagata lautele po o isi asiasiga pe faaaogaina (i le a lava le tulaga ua faamatalaina ai), e tatau i le Komesina ona tuuina atu pe faia, i le tulaga o lo o manaomia ai, ia lisi o faasologa o igoa o le aupalota e aunoa ma ata o lo o manaomia i lalo o le faafuaiupu (1D).

(1G) Afai ona o so o se mafuaaga, o se tagata o lo o talosaga mo le faamauina po o le toe faamauina po o le liliu ese atu o lona faamauina e avea o se tagata palota po o se tagata palota taitoatasi ua ia le mafai ona tausia pe musu pe ua le mafai ona pueina sona ata e tusa ai ma le faafuaiupu (1C), e le tatau i le Komesina ona faamauina sea tagata i se lisi o le faasologa o igoa o le aupalota e avea ai o se tagata palota po o se tagata palota taitoatasi.

(1H) E tatau i tagata taitoatasi uma ua faamauina e avea o se tagata palota pe o se tagata palota taitoatasi i le aso ua amata faamamaluina ai le Tulafono o Teuteuga o le Tulafono o Faiga Palota 2005, ona toe manaomia ia toe talosaga mo le faamauina e tusa ai ma aiaiga o lenei Tulafono ma lenei fuaiupu i se taimi ma se nofoaga ma i se faiga ua fuafuaina e le Komesina e ala i se Faasilasilaga Faalauaitele.

(1I) E tatau i tagata taitoatasi uma ua faamauina ma pueina ata e tusa ai ma lenei Tulafono ma lenei fuaiupu, ona manaomia ina ia toe pueina ata e tusa ai ma aiaiga o lenei fuaiupu i ni taimi faavaitaimi e le itiiti ifo i le 9 tausaga ma le silia le 10 tausaga mai le aso lea na pueina ai mulimuli ata o le tagata i lalo o lenei fuaiupu i se taimi ma se nofoaga ma i se faiga ua fuafuaina e le Komesina e ala i se Faasilasilaga Faalauaitele.

(1J) E tatau i le Komesina ona suia ata o tagata palota ma tagata palota taitoatasi sa pueina e tusa ai ma le faafuaiupu (II) mo ata o tagata palota ma tagata palota taitoatasi sa pueina muamua, tusia pe lomía e tusa ai ma aiaiga o lenei fuaiupu, i le a lava le tulaga e manaomia ai.

(1K) O tagata taitoatasi uma e manaomia le toe pueina o ata e tusa ai ma lenei fuaiupu, o i latou ia ua le mafai ona faia faapea e aunoa ma se mafuaaga faaletulafono ua faia se solitulafono e mafai ona faasalaina i se salatupe e le silia le 1 iunite tau faasalaga.”

(2) Ua teuteuina le Tulafono Autu e ala i le:

- (a) aveeseina mai le fuaiupu 5(1), upu “o lē o lo o umia se Pepa e Iloagofie ai e tusa ai ma le fuaiupu 135A o le Tulafono”;

- (b) aveesea mai le fuaiupu 22(2) upu uma ina ua tuanai upu “lisi o igoa o le au palota taitoatasi”;
- (c) aveesea o le fuaiupu 25C(6);
- (d) aveesea mai le fuaiupu 70A upu “i le fuaiupu 70B ma”;
- (e) aveesea le fuaiupu 135A; ma
- (f) aveesea le fuaiupu 70B.

6. Uiga agavaa o tagata palota—(1) Ua teuteuina le fuaiupu 16 o le Tulafono Autu i le aveesea o faafuaiupu (2)(b)(d)(e) (f), (3),(4),(5), (6), (7) ma le (8) ma sua e faapea:

“(2)(b) Afai e lē umia e le tagata palota se suafa Matai, e tatau ona faamauina le tagata palota i totonu:

- (i) o le itumalo lea o lo o nofo ai le tagata palota; po o
- (ii) afai o le tagata palota o ia lea o le toalua po o se matua po o se atalii po o se uso po o se tuafafine o se Matai ma ua filifilia e lea tagata palota le itumalo o lo o faamauina ai lena matai.

(3) I le noatia ma le fai fuafua i lenei Tulafono, e tatau ona agavaa le tagata palota ina ia faaliliu ese atu i se taimi e tasi i le itumalo lea o lo o faamauina ai lea tagata palota i le va o faiga palota aoao.”

(2) Ua teuteuina le fuaiupu 19 o le Tulafono Autu i le aveesea mai le faafuaiupu (1)(b)(i) o upu “fanau a fanau”.

7. Faatinoga o “O’o” ma “Momoli” – O le Tulafono Autu ua teuteuina i le faaofiina ina ua tuanai le fuaiupu 97 e faapea:-

“97A. Faatinoga o “O’o” ma “Momoli” – E ui lava i isi aiaiga o lenei Tulafono, o le faatinoga o se “O’o” ma “Momoli” faaleaganuu e se Sui Usufono po o se Sui Faatu mo le Palemene po o se tagata e avea ai ma sui o sea Sui Usufono po o sea Sui Faatu, e le tatau ona faavasegaina lea faiga e faapea o se faiga sese e faatosina ai po o se faiga faatosina, po o se gaioiga po o se faiga tauvalea e le tusa ai

ma le tulafono, a ia fai fuafua e faapea o le tuuina atu o O'o ma Momoli ia faia lea i le vaitaimi e amata faitauina mai i le 180 aso seia faamuta i le 90 aso mai i le aso e muta ai le Paeaiga a le Palemene, o le aso lea e atoa i ai le 5 tausaga talu mai le aso o le Faiga Palota Aoa na seia tuanai atu.”

O le Tulafono o Teuteuga o le Tulafono o Faiga Palota 2005 o lo o faafoeina e le Matagaluega o Faamasinoga ma Pulega Tau Faamasinoga

**Lolomiina e le Failautusi o le Fono Aoa Faitulafono,
i le pule a le Fono Aoa Faitulafono.**